

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA**

OBRAĐIVAČ: SLUŽBA ZA FINANSIJE

**IZVJEŠTAJ
O PROVEDENOJ JAVNOJ RASPRAVI NA
NACRT BUDŽETA GRADA ZENICA ZA 2026. GODINU I
NACRT ODLUKE O IZVRŠAVANJU BUDŽETA
GRADA ZENICA ZA 2026. GODINU**

Zenica, decembar 2025. godine

**IZVJEŠTAJ O PROVEDENOJ JAVNOJ RASPRAVI NA
NACRT BUDŽETA GRADA ZENICA ZA 2026. GODINU I
NACRT ODLUKE O IZVRŠAVANJU
BUDŽETA GRADA ZENICA ZA 2026. GODINU**

Na 14. sjednici Gradskog vijeća Zenica, održanoj dana 05.12.2025. godine, utvrđeni su Nacrt Budžeta Grada Zenica za 2026. godinu i Nacrt Odluke o izvršavanju Budžeta za 2026. godinu, te su isti upućeni na javnu raspravu u trajanju od 10 dana od dana održavanja sjednice Gradskog vijeća, odnosno zaključno sa 15.12.2025. godine.

Utvrđeni Nacrt Budžeta Grada Zenica za 2026. godinu, Obrazloženje Nacrta Budžeta Grada Zenica za 2026. godinu i Nacrt Odluke o izvršavanju Budžeta Grada Zenica za 2026. godinu sa Obrazloženjem objavljeni su na web stranici Grada Zenica (zenica.ba).

Na samoj sjednici vijećnici su iznijeli svoje primjedbe, prijedloge i sugestije, predlagač je na većinu primjedbi, prijedloga i sugestija odmah dao svoj stav, tako da iste nismo navodili u ovom aktu. Takođe, predlagač je pozvao sve predstavnike klubova Gradskog vijeća Zenica na sastanak, kako bi se razgovaralo o njihovim prijedlozima na Nacrt Budžeta Grada Zenica za 2026. godinu.

Dana 12.12.2025. godine, u Gradskoj upravi Zenica, održan je sastanak kojem su prisustvovali Gradonačelnik Zenice Fuad Kasumović, predstavnici Službe za finansije i predstavnici političkih stranaka: BHI-KF, SDP i Snage Naroda, u cilju razmatranja prijedloga, primjedbi i sugestija, a sve kako bi se pripremio što kvalitetniji Prijedlog Budžeta Grada Zenica za 2026. godinu.

U toku javne rasprave dostavljene su primjedbe, prijedlozi i sugestije na Nacrt Budžeta Grada Zenica za 2026. godinu, a Služba za finansije je iste prosljedila nadležnim budžetskim korisnicima na razmatranje i nadležno postupanje.

U nastavku dajemo pregled dostavljenih primjedbi, prijedloga i sugestija sa stavom predlagača, odnosno nadležnog budžetskog korisnika.

1. Halil Arnaut, vijećnik u Gradskom vijeću Zenica i Klub vijećnika BHI-KF predlažu povećanje transfera JU Dom-porodica Zenica za sufinansiranje rada gradske kuhinje. Halil Arnaut predlaže da ukupan iznos na navedenoj stavci iznosi 305.775,00 KM, s obzirom da je za pokriće troškova nabavke hrane potrebno minimalno 157.950,00 KM, a za usluge spravljenja i distribucije hrane oko 147.825,00 KM. Klub vijećnika BHIKF predložio je da se navedena stavka uveća za 50.000,00 KM.

Stav predlagača

Predlagač je razmotrio upućene prijedloge, te u Prijedlogu Budžeta Grada Zenica za 2026. godinu na budžetskoj poziciji "Transfer JU Dom-porodica Zenica za sufinansiranje rada

gradske kuhinje" planirao sredstva u iznosu od 200.000,00 KM, odnosno istu uvećao za 50.000,00 KM.

2. U cilju realizacije projekta javno-privatnog partnerstva, koji podrazumijeva finansiranje i upravljanje kontinuiranim obavljanjem djelatnosti snabdijevanja građana lijekovima, Klub vijećnika BHI-KF predlaže da se za rad dežurne gradske apoteke planira iznos od 100.000,00 KM.

Stav predlagača

Nakon razmatranja prijedloga, predlagač je isti prihvatio u potpunosti. U Prijedlogu Budžeta Grada Zenica za 2026. godinu, na novoj budžetskoj poziciji "Transfer za zdravstvo - sufinansiranje rada dežurnih apoteka" planirana su sredstva u iznosu od 100.000,00 KM.

3. Klub vijećnika GO SDP BiH Zenica dostavio je prijedloge da se u Budžetu Grada Zenica za 2026. godinu izdvoje sredstva za sufinansiranje izgradnje i rekonstrukcije stadiona "Papirna", rekonstrukciju "B terena", te zamjenu plastične trave u ukupnom iznosu od 600.000,00 KM.

Stav predlagača

Služba za kulturu, sport i društvene djelatnosti, kao resorna služba, planirala je u 2026. godini izvršiti pripreme za izgradnju zatvorene dvorane "Papirna", na način da će pribaviti projektnu dokumentaciju, dozvole i saglasnosti. Za navedene potrebe Predlagač je u Prijedlogu Budžeta Grada Zenica za 2026. godinu planirao novu budžetsku poziciju "Sufinansiranje izgradnje i rekonstrukcije sportskih objekata i terena" u iznosu od 300.000,00 KM.

4. Denan Pašalić, vijećnik u Gradskom vijeću ispred stranke BHI-KF predlaže povećanje sredstava na budžetskoj poziciji "Nabavka građevina za potrebe mjesnih zajednica" u iznosu od 50.000,00 KM.

Stav predlagača

Predlagač je razmotrio navedeni prijedlog, te donio odluku da se isti u potpunosti prihvati. Budžetska pozicija "Nabavka građevina za potrebe mjesnih zajednica" u Prijedlogu Budžeta Grada Zenica iznosi 150.000,00 KM, odnosno uvećana je za 50.000,00 KM.

5. Klub vijećnika BHI-KF, vijećnik Namir Škaljo i vijećnica Emina Babić predložili su povećanje transfera za sufinansiranje rada Gorske službe spašavanja.

Stav predlagača

Služba za civilnu zaštitu nastoji da na objektivan i racionalan način rasporedi raspoloživa budžetska sredstva, jer pri ovoj Službi postoji više jedinica zaštite i spašavanja, među kojima je i GSS (Gorska služba spašavanja) Zenica, a koje se opremaju iz sredstava posebnih namjena u skladu sa određenim zakonskim procedurama. Predlagač je razmotrio upućeni prijedlog, te isti prihvatio, tako da je u Prijedlogu Budžeta Grada Zenica za 2026. godinu planirao povećanje na

budžetskoj poziciji "Transfer za sufinansiranje rada Gorskog službe spašavanja" u iznosu od 7.000,00 KM, tako da je ista planirana u iznosu od 12.000,00 KM.

6. Klub vijećnika BHI-KF i Naša stranka predlažu da se povećaju sredstva planirana na poziciji "Kapitalni transfer za opremanje i adaptaciju smještajnih kapaciteta JU Dom za stara lica Zenica". Klub vijećnika BHI-KF je tražio povećanje iznosa za 10.000,00 KM, dok je Naša stranka tražila povećanje iznosa za 40.000,00 KM.

Stav predlagača

Nakon razmatranja upućenih prijedloga, budžetska pozicija "Kapitalni transfer za opremanje i adaptaciju smještajnih kapaciteta JU Dom za stara lica Zenica", u Prijedlogu Budžeta Grada Zenica, planirana je u iznosu od 30.000,00 KM, što je u odnosu na Nacrt Budžeta veće za 10.000,00 KM.

7. Klub vijećnika BHI-KF, vijećnika kluba SDA – Zeldi Dizdarević, SDP i Snaga Naroda predložili su da se planirani iznos na budžetskoj poziciji "Transfer za sport" poveća za iznos od 250.000,00 KM.

Stav predlagača

Predlagač, nakon razmatranja navedenog prijedloga, isti je u potpunosti prihvatio, tako da je budžetska pozicija "Transfer za sport" u Prijedlogu Budžeta Grada Zenica za 2026. godinu planirana u iznosu od 1.250.000,00 KM, odnosno uvećana je za 250.000,00 KM.

8. Klub vijećnika GO SDP BiH Zenica dostavio je prijedlog da se u Prijedlogu Budžeta za 2026. godinu formira nova pozicija "Izrada projekta rekonstrukcije fontane u Gradskom parku Zenica" u iznosu od 50.000,00 KM

Stav predlagača

U Prijedlogu Budžeta Grada Zenica za 2026. godinu, u okviru organizacionog koda Službe za razvoj, planirana je budžetska pozicija "Izrada projektno tehničke dokumentacije" u iznosu od 100.000,00 KM, a koja je između ostalog namijenjena i za realizaciju izrade projekta dokumentacije za Gradski park.

9. Klub vijećnika BHI-KF predlaže povećanje planiranog iznosa budžetske pozicije "Rekonstrukcija i investiciono održavanje poslovnih prostora društvenih domova" za 100.000,00 KM, navodeći da je već spremna projektna dokumentacija za unutrašnje uređenje Doma za mlade, za šta bi bio potreban iznos od 85.000,00 KM.

Stav predlagača

Predlagač je prihvatio dostavljeni prijedlog, te u Prijedlogu Budžeta za 2026. godinu povećao sredstva na budžetskoj poziciji "Rekonstrukcija i investiciono održavanje poslovnih

prostora društvenih domova" na iznos od 450.000,00 KM, a što je za 100.000,00 KM više u odnosu na Nacrt Budžeta.

10. Almir Dračo vijećnik u Gradskom vijeću Zenica dostavio je prijedlog da se u Budžetu Grada Zenica za 2026. godinu planiraju sredstva za finansiranje održavanja sekundarne mreže vrelovoda u mjesnim zajednicama.

Stav predlagača

Predlagač je razmotrio dostavljeni prijedlog i u okviru sredstava rasporeda akumulisanog suficita planirao iznos od 100.000,00 KM na ime izdataka za tekuće održavanje sekundarnog vrelovoda u MZ.

11. Vijećnik Denan Pašalić predložio je da se planirani iznos budžetske pozicije "Izdaci za tekuće održavanje prostorija MZ" poveća za 20.000,00 KM.

Stav predlagača

Predlagač je razmotrio dostavljeni prijedlog, te isti djelimično prihvatio. U Prijedlogu Budžeta Grada Zenica za 2026. godinu budžetska pozicija "Izdaci za tekuće održavanje prostorija MZ" iznosi 50.000,00 KM, a što je za 15.000,00 KM više u odnosu na utvrđeni Nacrt.

12. Interventna spasilačka služba Zenica i Klub vijećnika GO SDP BiH Zenica predlažu povećanje iznosa na budžetskoj poziciji "Transfer za sufinansiranje rada Interventne spasilačke službe Zenica", i to, Interventna spasilačka služba Zenica za iznos od 15.000,00 KM, a Klub vijećnika GO SDP BiH Zenica za iznos od 7.000,00 KM. Takođe, Interventna spasilačka služba Zenica predlaže da se obezbijede sredstva u iznosu od 12.000,00 KM za nabavku termalnog drona za pretrage nepristupačnog terena na vodi i pored vode.

Stav predlagača

Služba za civilnu zaštitu nastoji da na objektivan i racionalan način rasporedi raspoloživa budžetska sredstva i svake godine učestvuje u finansiranju nabavke materijalno tehničkih sredstava za sve službe zaštite i spašavanja. S obzirom na navedeno, Predlagač je razmotrio upućene prijedloge, te djelimično prihvatio iste, tako što je u Prijedlogu Budžeta Grada Zenica za 2026. godinu na budžetskoj poziciji "Transfer za sufinansiranje rada Interventne spasilačke službe Zenica" planirao sredstva u iznosu od 12.000,00 KM, a što je za 7.000,00 KM više u odnosu na Nacrt Budžeta.

13. Udruženje poslodavaca Zenica i Udruženje privrednika Grada Zenica dostavili su prijedlog da se poveća planirani iznos na poziciji "Tekući transfer privatnim preduzećima i poduzetnicima", i to, Udruženje poslodavaca Zenica za iznos od 700.000,00 KM, a Udruženje privrednika Grada Zenica za iznos od 400.000,00 KM.

Stav predlagača

Predlagač je razmotrio dostavljene prijedloge, te iste djelimično prihvatio i u skladu sa trenutnim mogućnostima u Prijedlogu Budžeta Grada Zenica za 2025. godinu planirao sredstva u iznosu od 350.000,00 KM na budžetskoj poziciji "Tekući transfer privatnim preduzećima i poduzetnicima", što predstavlja povećanje za 50.000,00 KM u odnosu na Nacrt Budžeta.

14. Udruženje veterana BH rata i odbrane bosanske časti "Bosanska čast" predložilo je da se poveća planirani iznos sredstava na budžetskoj poziciji "Finansiranje organizovanja i obilježavanja značajnih datuma, događaja i ličnosti Grada Zenica" za 20.000,00 KM, kao i na budžetskoj poziciji "Transferi za finansiranje programa i projekata udruženja i organizacija boračke populacije" za 60.000,00 KM.

Stav predlagača

Predlagač je razmotrio dostavljene prijedloge, te ih djelimično prihvatio. Na budžetskoj poziciji "Finansiranje organizovanja i obilježavanja značajnih datuma, događaja i ličnosti Grada Zenica" prihvaćeno je povećanje u iznosu od 10.000,00 KM. Predlagač nije u mogućnosti prihvatiti prijedlog koji se odnosi na uvećanje budžetske pozicije "Transferi za finansiranje programa i projekata udruženja i organizacija boračke populacije" za iznos od 60.000,00 KM. Naime, sredstva za navedenu svrhu u 2025. godini planirana su u iznosu od 250.000,00 KM, što znači da su u Nacrtu Budžeta za 2026. godinu već uvećana za 10.000,00 KM.

15. Javno preduzeće "ZENICAGAS" d.o.o. Zenica predlaže da se u Budžetu Grada Zenica za 2026. godinu planiraju sredstva u iznosu od 785.000,00 KM za izgradnju sekundarne distributivne mreže od glavne mjerno - regulacione stanice Kanal do Kantonalne bolnice Zenica, sa napomenom da bi se izgradnja obavljala paralelno sa radovima na izgradnji primarne distributivne gasne mreže na dionici. Takođe, JP "ZENICAGAS" d.o.o. Zenica predlaže povećanje budžetske pozicije "Izdaci za finansiranje rada JP ZENICAGAS d.o.o. Zenica" na iznos od 393.250,00 KM.

Stav predlagača

Iznos od 785.000,00 KM, predložen od strane JP "ZENICAGAS" d.o.o. Zenica je već planiran Nacrtom Budžeta u sklopu iznosa od 1.000.000,00 KM na budžetskoj poziciji "Transfer JP ZENICAGAS d.o.o. Zenica - izgradnja distributivne gasne mreže, ICT infrastrukture i izrada tehničke dokumentacije". Predlagač i resorna Služba za komunalne poslove su saglasni da se iznos na budžetskoj poziciji "Izdaci za finansiranje rada JP ZENICAGAS d.o.o. Zenica" uveća, te u Prijedlogu Budžeta Grada Zenica za 2026. godinu ista iznosi 393.000,00 KM, odnosno uvećana je za 28.000,00 KM.

16. Udruženje penzionera/umirovljenika Grada Zenica uputilo je molbu da se u Budžetu Grada Zenica za 2026. godinu obezbijede sredstva za:

- za materijalnu pomoć, isplatu posmrtnina, subvencije za troškove liječenja i pakete za teško bolesne i nepokretne penzionere u iznosu od 100.000,00 KM;

- za subvencioniranje godišnjih autobuskih karata za prijevoz penzionera/umirovljenika na području Grada Zenica u iznosu od 90.000,00 KM i
- adaptaciju objekta i prostorija koje koriste penzioneri/umirovljenici Grada Zenica (zamjena unutrašnje i vanjske stolarije) u iznosu od 30.000,00 KM.

Stav predlagača

Iznos od 100.000,00 KM već je planiran Nacrtom Budžeta na poziciji "Transfer Udruženju penzionera za pomoć socijalno ugroženim penzionerima". Kada je u pitanju subvencioniranje godišnjih autobuskih karata za prijevoz penzionera/umirovljenika na području Grada Zenica, Predlagač i resorna Služba su stava da su sredstva od 75.000,00 KM planirana Nacrtom Budžeta za ove namjene i ne postoji mogućnost povećanja istih. Predlagač i resorna Služba za kulturu, sport i društvene djelatnosti smatraju da se navedeni prijedlog za adaptaciju objekta i prostorija koje koriste penzioneri/umirovljenici Grada Zenica ne može prihvatiti jer Grad u planiranju realizacije kapitalnih investicija ima prioritet kod izgradnje, rekonstrukcije i sanacije vlastitih objekata.

17. JU Predškolski odgoj i obrazovanje Zenica i Naša stranka Zenica podnijeli su prijedlog za uvećanje sredstava za finansiranje rada JU Predškolski odgoj i obrazovanje Zenica, na način da se poveća iznos planiran na budžetskoj poziciji "Finansiranje rada JU Predškolski odgoj i obrazovanje Zenica". JU Predškolski odgoj i obrazovanje Zenica predlaže iznos od 3.673.379,00 KM, dok Naša stranka Zenica predlaže iznos od 2.200.000,00 KM. Takođe, JU Predškolski odgoj i obrazovanje Zenica predlaže da se planiraju sredstva u iznosu od 600.000,00 KM za investiciona ulaganja (natkrivanje terasa u vrtićima "Pinokio" i "Pčelica" i rekonstrukcija postojeće dotrajale ograde na terasama vrtića).

Stav predlagača

Stav Predlagača je da se dostavljeni prijedlog trenutno ne može prihvatiti. U skladu sa dostavljenim budžetskim zahtjevom Ustanove, te uvidom u prethodno dostavljenu dokumentaciju i izvršenim detaljnim analizama, a cijeneći prihodovnu stranu i obaveze prema ostalim subjektima i obaveze koje Grad ima u okviru drugih budžetskih aktivnosti, ne može se prihvatiti uvećanje za navedeni iznos, jer je stavka već uvećana u odnosu na prethodnu budžetsku godinu. Naime, Prijedlogom Budžeta Grada Zenica za 2026. godinu planiran je iznos od 1.350.000,00 KM na budžetskoj poziciji "Finansiranje rada JU Predškolski odgoj i obrazovanje Zenica, a što je za 250.000,00 KM više u odnosu na Budžet 2025. godine. Pored navedenog, Grad Zenica iz budžeta plaća i troškove grijanja ove Ustanove direktno JP-u "Grijanje Zenica" u godišnjem iznosu od cca 130.000,00 KM.

18. LS BAU INVEST d.o.o Zenica dostavilo je prijedlog za finansiranje izgradnje mosta preko rijeke Kočeve u naselju Pišće, uz spremnost pravnog lica da finansira izradu projektne dokumentacije za izgradnju mosta.

Stav predlagača

Uzimajući u obzir činjenicu da je Budžet za 2026. godinu kapitalnog i razvojnog karaktera, te da je značajan dio sredstava izdvojen za prioritetne kapitalne projekte, predlagač trenutno nije u mogućnosti obezbjediti sredstva za ovu namjenu.

19. Udruženje poslodavaca Zenica predlaže da se u Budžet uvrsti stavka za sufinansiranje boravka djece u privatnim predškolskim ustanovama za šta bi u Prijedlogu Budžeta Grada Zenica za 2026. godinu trebalo izdvojiti sredstva u iznosu od 100.000,00 KM.

Stav predlagača

Grad kao osnivač ima obavezu sufinansiranja u segmentu javne djelatnosti predškolskog odgoja i obrazovanja, te za istu izdvaja sredstva u iznosu od 1.350.000,00 KM. Imajući u vidu i zahtjeve drugih javnih ustanova i preduzeća, te planove infrastrukturnih ulaganja u tekućoj godini, nije moguće uvrstiti traženu subvenciju za sufinansiranje privatnih predškolskih ustanova.

Resorna Služba razmatrala je sufinansiranje boravka djece u privatnim predškolskim ustanovama i pri izradi Nacrta Budžeta Grada Zenica za 2026. godinu, te s obzirom na projicirani broj djece koji pohađaju navedene ustanove nije moguće istu realizovati zbog potrebnog iznosa, kao i pripreme potrebne procedure, kriterija, odluke, iznosa i drugo.

20. Udruženje privrednika Grada Zenica dostavilo je prijedlog da se budžetska pozicija "Transferi neprofitnim organizacijama - udruženjima" poveća za iznos od 20.000,00 KM.

Stav predlagača

Predlagač je razmotrio dostavljeni prijedlog, te i pored stava da je neophodno kontinuirano pružati podršku nevladinom sektoru, trenutno nije u mogućnosti uvećati sredstva za ovu namjenu u Prijedlogu Budžeta za 2026. godinu.

21. Udruženje estradnih izvođača Zeničko-dobojskog kantona predlaže da se u Prijedlogu Budžeta Grada Zenica za 2026. godinu izdvoje sredstva u iznosu od 10.000,00 KM za novu budžetsku poziciju "Programi i projekti estradnih izvođača".

Stav predlagača

Predlagač je razmotrio dostavljeni prijedlog, ali trenutno nije u mogućnosti udovoljiti istom. Sva udruženja na jednakim osnovama mogu prijaviti projekte i programe, koji će se analizirati i u skladu sa kvalitetom projektnog prijedloga ili programa podržati.

22. Naša stranka Zenica predlaže da se budžetska pozicija "Finansiranje nacionalnih udruženja, udruženja nacionalnih manjina i kulturno umjetničkih društava" razdvoji na dvije posebne budžetske pozicije, i to:

- Finansiranje nacionalnih udruženja i

- Finansiranje udruženja nacionalnih manjina i kulturno-umjetničkih društava, uz zadržavanje ukupno planiranog iznosa sredstava iz Nacrta Budžeta.

Stav predlagača

Prijedlog Naše stranke uzet je u razmatranje, ali s obzirom na činjenicu da je dostavljen 16.12.2025. godine, što je izvan perioda javne rasprave, isti nije uvažen.

Na kraju ističemo da je na Nacrt Budžeta Grada Zenica za 2026. godinu, kako se vidi iz ovog materijala, dostavljen veći broj primjedbi, prijedloga i sugestija od strane vijećnika, političkih stranaka, javnih ustanova, javnih preduzeća, privrednih subjekata i udruženja, od kojih je predlagač, a u skladu sa mogućnostima, pojedine prihvatio i ugradio u Prijedlog Budžeta za 2026. godinu. Na Nacrt Odluke o izvršavanju Budžeta za 2026. godinu nije dostavljen nijedan prijedlog, primjedba ili sugestija.

SLUŽBA ZA FINANSIJE